



Siaran **AKHBAR**

KEMENTERIAN PERTAHANAN MALAYSIA

MOD.100/2/1/2 JLD 5 (57) 05/06

TIMBALAN MENTERI PERTAHANAN SANTUNI VETERAN ANGKATAN TENTERA MALAYSIA DALAM PROGRAM PEDULI VETERAN PERINGKAT NEGERI PERLIS

PERLIS, 30 Jun 23 - YB Adly bin Zahari, Timbalan Menteri Pertahanan hari ini telah melaksanakan Program Peduli Veteran (PPV) peringkat Negeri Perlis yang turut diiringi oleh Mej Jen Zambery Jefry bin Haji Darus, Ketua Pengarah Jabatan Hal Ehwal Veteran (JHEV) Angkatan Tentera Malaysia (ATM).

Dalam program PPV kali ini, YB Adly telah menyantuni empat (4) orang Veteran ATM di sekitar Negeri Perlis. Program ini merupakan salah satu manifestasi Kementerian Pertahanan dalam memastikan agenda kebajikan Veteran ATM dan tanggungannya sentiasa diutamakan. PPV yang dilaksanakan ini merangkumi lawatan kebajikan ke rumah veteran yang mengalami sakit kritikal, uzur serta hidup dalam keadaan daif. Selain bertanya khabar, turut diselitkan penyampaian sumbangan sagu hati dan bakul makanan kepada veteran yang diziarahi. Pada masa yang sama, Timbalan Menteri Pertahanan juga turut mengunjungi usahawan veteran ATM yang berjaya di dalam bidang usahawan yang diceburi.

Lawatan ke rumah veteran ATM pertama yang lumpuh dan terlantar bertempat di Kampung Batu 19 3/4, Jalan Padang Besar, Perlis, iaitu Encik Dan@Zain bin Salleh berusia 78 tahun merupakan veteran Rejimen Askar Wataniah tidak berpencen berpangkat Prebet. Isteri veteran telah meninggal dunia pada 9 Ogos 2014 dan veteran merupakan penerima Bantuan Sara Hidup (BSH) berjumlah RM300.00 sebulan serta telah dicadangkan untuk menerima bantuan susu secara *one off*.

Seterusnya, lawatan diteruskan ke rumah veteran ATM kedua iaitu Encik Ismail bin Osman berusia 69 tahun di Batu 16, Kampung Aman, Kaki Bukit, Perlis. Veteran merupakan bekas anggota tentera berpangkat Prebet, menghidap penyakit darah tinggi dan kolestrol serta mempunyai pendapatan sebanyak RM300.00 sebulan dengan bekerja sendiri serta tidak berpencen. Veteran mempunyai sembilan (9) orang anak hasil perkongsian hidup bersama isterinya, Puan Rosmawati binti Md Isa yang berusia 60 tahun dan sedang menghidap penyakit strok, kencing manis serta darah tinggi. Veteran telah disyorkan sebagai penerima BSH berjumlah RM300.00 sebulan.

Timbalan Menteri Pertahanan kemudiannya meluangkan masa mengunjungi usahawan veteran ATM tidak berpencen, Hj Anuar bin Daud berusia 64 tahun di alamat No 766, Lorong Abi 18, Alor Kabung, Abi, Kangar, Perlis. Veteran merupakan seorang bekas anggota tentera berpangkat Laskar Kanan, kini merupakan usahawan kilang kopi pra campuran dan menghidap penyakit kencing manis dimana tapak kaki kanannya telah dipotong.

Lawatan Timbalan Menteri Pertahanan diakhiri dengan mengunjungi usahawan veteran ATM tidak berpencen, Kapten Ku Azizan bin Ku Chik (Bersara) berusia 58 tahun di alamat No 4, Lorong Seri Kamuning, Kampung Hutan Buluh, Jejawi, Arau, Perlis. Veteran merupakan seorang usahawan kilang produk minuman soya. Veteran mempunyai dua (2) orang anak hasil perkongsian hidup bersama isterinya, Puan Rohayu binti Mohd Sharif.

PPV adalah merupakan antara inisiatif madani Kementerian Pertahanan dalam merealisasikan pelaksanaan dan halatuju Kertas Putih Pertahanan (KPP). PPV akan memastikan kebajikan dan kesejahteraan Veteran ATM terus terbela dan sentiasa terpelihara sejajar dengan jasa bakti dan pengorbanan Veteran ATM terhadap keamanan dan keselamatan negara. Melalui program ini, lebih ramai Veteran ATM yang terkesan dapat disantuni bagi mendengar sebarang luahan mereka secara bersemuka.

Sehingga Jun 2023, sebanyak 10 PPV telah dilaksanakan bagi memastikan Veteran ATM di seluruh negara dapat menikmati bantuan dan kemudahan yang disediakan oleh JHEV ATM. Kementerian Pertahanan beriltizam untuk terus komited dalam mempertingkatkan lagi siri lawatan kebajikan yang akan datang agar tiada Veteran ATM yang tercicir daripada menerima insentif yang disediakan. Sebagai maklumat, data Veteran ATM yang telah berdaftar dengan JHEV sehingga 31 Mac 2023 adalah sebanyak 108,589 veteran berpencen, manakal 70,188 veteran tidak berpencen menjadikan jumlah keseluruhan seramai 178,777 veteran.

Sebarang pertanyaan berkaitan lawatan boleh hubungi Pegawai Staf 2 Media (Udara), Unit Komunikasi Strategik, Kementerian Pertahanan Malaysia, Mejar Ezrie Haniff bin Yusoff TUDM di talian 017-254 0477 dan Ketua Unit Komunikasi Korporat, JHEV ATM, Kapt Mohammad Asyraf bin Mohd Ameran TUDM di talian 019-208 1023.

-TAMAT-

“MALAYSIA MADANI”

“BERKHIDMAT UNTUK NEGARA”

“PERTAHANAN NEGARA TANGGUNGJAWAB BERSAMA”

Kementerian Pertahanan Malaysia
30 Jun 2023